

**Ն. Ա. Օ. Տ. Տ. ՊԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ ՀԱՅՈՑ ԶԵՂԱՍՊԱՆՈՒԹՅԱՆ ՍՈՒՐԲ ՆԱԿԱՏԱԿՆԵՐԻ
ՀԻՇԱՏԱԿՈՒԹՅԱՆ ՕՐՎԱ ԱՌԻԹՈՎ**

(24 ապրիլի, 2025 թ.)

«Դու չես լի նրանց, ովքեր
փնտրում են Քեզ, Տեր»
(Սաղմ. Թ. 11):

Սիրելի բարեպաշտ ժողովուրդ,

Այսօր Հայաստանում եւ ի սփյուռս աշխարհի ոգեկոչում ենք Հայոց Ցեղասպանության 110-րդ տարելիցը՝ խոնարհումով եւ աղոթքով հիշելով մեր սուրբ նահատակներին, ովքեր մարտիրոսության պսակն ընդունեցին «վասն հաւատոյ եւ վասն հայրենեաց»:

20-րդ դարասկզբին Օսմանյան կայսրության կողմից կազմակերպված հրեշավոր ցեղասպանությանը զոհ դարձան մեր ժողովրդի մեկ եւ կես միլիոն զավակներ: Իրագործված եղեռնի եւ հայրենազրկումի մեծ ողբերգությունները, սակայն, չկարողացան սպառել մեր ազգի կենսական ուժերը: «Ճնշված, բայց ոչ ընկճված, կարոտյալ, բայց ոչ հուսահատ, հալածված, բայց ոչ լքված» (Բ. Կորնթ. Դ. 8—9) մեր ժողովուրդը վերապրեց՝ ապավինելով խաչված եւ հարություն առած Փրկչին աշխարհի, վերապրեց հանուն արդարության ամենօրյա պայքարով, իր ինքնությանը կառչած եւ Հայոց արդար դատի հաղթանակի հավատով: Աստվածպարգեւ մեր հինավուրց հայրենիքի հանդեպ սերը, նվիրվածությունն իր սրբություններին, հավատարմությունն իր պատմությանն ու դարավոր հիշատակներին զորացրեցին ազգիս աշխարհի տարբեր երկրներում նոր կյանք ընձյուղելու, իսկ Արարատի փեշերին՝ Արեւելյան Հայաստանում, անկախ պետականություն վերակերտելու: «Դու չես լի նրանց, ովքեր փնտրում են Քեզ, Տեր»՝ սուրբգրային հուսառատ խոսքի հավատով ազգիս զավակները ամենուր դիմակայեցին ժամանակների փորձություններին, կենարար ավիշ առան՝ ազգային-հոգեւոր իրենց կյանքը վերա-

կանգնելու, բարձր արվեստ ու մշակույթ ստեղծելու եւ գիտություն ու կրթություն զարգացնելու:

Հիշատակի այս նվիրական օրը, սիրելիներ, աշխարհում ամեն տեղ մեր ժողովրդի զավակները իրենց քայլերն են ուղղում դեպի եկեղեցիներ եւ Մեծ Եղեռնի հուշակոթողներ՝ վերանորոգելու հանձնառության սրբազան ուխտը՝ իբրեւ պետություն, իբրեւ եկեղեցի եւ ժողովուրդ շարունակելու մշտական ջանքերը Հայոց Ցեղասպանության ճանաչման համար: Արդարեւ, մարդկության ու մարդկայնության դեմ գործված ոճրագործությունները չունեն ո՛չ արդարացում եւ ո՛չ վաղեմության ժամկետ: Հայոց Ցեղասպանության ճանաչումն ու համընդհանուր դատապարտումը առաքելություն է մեր ժողովրդի եւ քաղաքակիրթ ողջ մարդկության համար: Շնորհիվ աշխարհասփյուռ մեր ժողովրդի համախումբ ջանքերի եւ միջազգային հանրության աջակցության՝ բազմաթիվ երկրներ ու իրավապաշտպան կազմակերպություններ իրենց ձայնն են բարձրացրել հանուն արդարության եւ Հայոց Ցեղասպանությունը ճանաչել ու որակել են որպես մարդկության դեմ իրագործված հանցագործություն:

Հայոց Ցեղասպանության դատապարտումը չպիտի սահմանափակվի սոսկ հուշարձանների մոտ համախմբումով, այլ պիտի գործադրվեն հետեւողական քայլեր՝ մեր ժողովրդի հանդեպ արդարությունը վերականգնելու եւ կանխելու նման ողբերգությունները: Առանց այսօրինակ հանցագործությունների դատապարտման, առանց պատմական արդարության հետ առերեսվելու՝ հնարավոր չէ խաղաղություն հաստատել ազգերի եւ պետությունների միջեւ եւ սերունդներին փոխանցել լուսավոր ապագա: Ապահով ու անվտանգ աշխարհ կառուցելու ճանապարհը բացառումն է բռնությունների, պատերազմների, ատելության ու թշնամանքի հրահրումների: Մեր արդար դատի պահանջատիրությունը չունի իր մեջ ատելություն ու թշնամանք: Պահանջատիրությունը ցուցիչն է ազգային մեր արժանապատվության եւ հարացույցը՝ մեր սուրբ նահատակների նկատմամբ հարգանքի ու նրանց հիշատակի առջեւ մեր խոնարհումի: Պահանջատիրությունը մեր պատասխանատվությունն է գալիք սերունդների առջեւ:

Սիրելի ժողովուրդ հայոց, մերօրյա ծանր ու դժվարին իրավիճակում, երբ նոր ցեղասպանության իրականացմամբ այլեւս բռնազավթված եւ հայաթափված է Արցախը, եւ Հայաստանը գտնվում է անվտանգային սպառնալիքների առջեւ, առավել հրամայական է անսասան պահել հա-





վատարմությունը հավատք, ազգ ու հայրենիք նվիրական արժեքներին, հրամայական է միաբանվել ու մշտապես գործել արդարության հաղթանակի համար եւ վերափոխել մեր կյանքի ընթացքը՝ հանուն ազգային վերազարթոնքի: Տերը չի լքում Իրեն փնտրողներին՝ այս անխախտ համոզումով շարունակենք արիաբար դիմակայել մեզ բաժին ընկած փորձություններին եւ համատեղ ուժերով բարեզարդել ազգային եւ հայրենական մեր կյանքը: Հակառակ առկա անվտանգային սպառնալիքների եւ շարունակվող ներազգային պառակտվածության, հակառակ մեր իրականության մեջ տեղ գտնող պատմության ու արժեքային խեղաթյուրումների, քարոզվող այլեւայլ կեղծ ընկալումների՝ նախանձախնդիր լինենք հոգեւոր ու բարոյական մեր արժեքների պահպանությանը եւ զորանանք հայրենիքի ու ազգի հանդեպ սիրով: Հիրավի, մեր նախնայաց ժառանգության նկատմամբ հավատարմությունը, համազգային համերաշխությունն ու հայրենիքի հանդեպ պարտքի բարձր գիտակցությունը երաշխիքն են մեր ազգի հարատեւության եւ անկախ պետականության գոյության:

Մեր սուրբ նահատակների հիշատակն այսօր մեզ ազդարարում է հրատապությունը ազգային միասնականության: Մեր համախոհության մեջ է գործում Աստված Իր օրհնությամբ ու շնորհներով: Այս ուղիով առաջնորդվելով, սիրելիներ, պիտի կարողանանք ապահովել անվտանգությունն ու բարօրությունը մեր հայրենիքի եւ իրագործել մեր երազանքները:

Այս հավատով աղոթք վերառաքենք առ Աստված եւ հայցենք մեր սուրբ նահատակների բարեխոսությունը, որ մարդկության կյանքում տեղ չգտնեն եղեռնական ոճրագործությունները, եւ հարուցյալ Քրիստոսի շնորհների ներքո խաղաղ ու ապահով լինեն մեր հայրենիքն ու մեր ժողովուրդը ի սփյուռս աշխարհի, եւ հուշսով ամուր ու սիրով միասնական՝ ի զորու լինենք հաղթահարելու մեր առջեւ ծառացած բոլոր փորձությունները:

Թող հարուցյալ մեր Տեր Հիսուս Քրիստոսի ողորմությունը, օրհնություններն ու խաղաղությունը լինեն մեզ հետ եւ ամենքի, այսօր եւ միշտ. ամեն:

